



12. august

UKA 2020/174

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Peqqinnissaqarfimmik oqartussaaffiup Naalagaaffimmut uterteqqissinnaanera pillugu Naalakkersuisut UKA2021-mut nalunaarusioqqullugit peqquneqarnissaannik Inatsisartut aalajangiiffigisassaattut siunnersuut. Nalunaarusiami qulaajarneqassapput oqartussaaffiup Naalagaaffimmut utertinneqarnerani qanoq aningaasatigut, sulisoqarnikkut kiffartuussinikkut, nunatsinnut aamma peqqissartunut kinguneqassanersoq.**

(Atassutip inatsisartuni ilaasortaaitai)

### **Tunnqavilersuut**

Peqqinnissaqarfipput artorsarpoq. Nutaarsiassaangilaq, aamma tamavitta misigereerparput peqqiillortilluta nakorsiariaraluartarnek, piumaffigineqaannartarpugulli nipaallisaatitulaaginnassasugut. Ajouraluartumik qularnanngitsumillu allaat aamma inuit inuunerannik naleqartarsimassalluni.

Kalaallit namminiilivikkiartornissatsinnut amerlanerussusillit siunertaqarput, pissusissamisuuginnartutullu isigineqartarluni naalagaaffinngoriartuaarnermut atatillugu oqartussaaffinnik tigusiartuaarnek. Soorlu siornatigut peqqinnissaqarfik nammineerluta angerlaassimagipput nammineerluta aqukkumallugu aningaasartuutigiumallugulu. Sulilu angerlaassuinissatsinnik siunnerfeqarluta, naak massakkut oqartussaaffigeriikkavut artorsartut.

Inuup peroriartortup imminullu napatissinnaajumasup nammineq akisussaaffinnik tigusiartuaarnera pissusissamisoorpoq, ineriartornerullu ilagiinnarlugu. Inulli, inuiaallu akisussaassusillit, nunamilu politikkerit oqartussaasut nassuersinnaasariaqarput. Aap, kukkusimavugut, immitsinnut artukkersimavugut taamaammallu iliuuseqartariaqarpugut. Aatsaat toquliivissortilluta nakorsiarsinnaasarniangilagut.

Uani siunnersuummi Naalakkersuisut peqqussavagut nalunaarusioqqullugit periarfissat qulaajaqqullugit, peqqinnissaqarfik naalagaaffimmut utertinneqassappat sullissinikkut, peqqissaanikkut, katsorsaanikkut qanoq allanngoriartoqassanersoq. Paaserusupparput nunarput tamakkerlugu sullissineq qanoq allannguuteqassanersoq aamma sulisoqarnikkut suut allannguutaassanersut. Minnerunngitsumillu paaserusupparput nunatta aningaasaqarneranut qanoq allannguuteqassanersoq oqartussaaffik naalagaaffimmut utertinneqassappat. Ilanngunneqarsinnaavortaaq naalagaaffik ilumut aamma utertitsinissamut suleqataarusussuseqarnerasoq.



Nassuersinnaaneq nukiuvoq artornarsinnaasoq. Nakimaatsuuneq, ineriartorusunneq, nunamullu asanninneq, nammineerusunneq, imminut pilersorsinnaaneq napatissinnaanerlu pingaarlunnarput. Taakkuli qaqugumulluunniit inuit peqqissusaannik tunulliussissutaanngisaannassapput. Inuk qitiutillugu suligutta, inuiaat nunalu peqqissumik ineriartortikkumaaratsigit.

Nalunaarusiallu inernerata takutikkumaarpaa peqqinnissaqarfiup naalagaaffimmut utertinnera qanoq sunniuteqarumaassagaluarnersoq.

**Aningaasatigut ingerlatsinikkullu pisortanut kingunerisassai:**

Nalunaarusiap UKA2020-mut inernissaa siunnerfigigaanni allaffissornikkut misissuinikkullu ukiup ataatsip nalinganik AC fuldmægtig sulisinneqassaaq, 500.000 kruuninik aningaasartalimmik.

**Namminersortunut aningaasarsiornikkut allaffissornikkullu kingunerisassai:**

Soqanngilaq.

**Innuttaasunut aningaasarsiornikkut allaffissornikkullu kingunerisassai:**

Soqanngilaq.